

國學基
本叢書
明

書

十二

明書卷一百五十八

列傳十八

宦官傳一

史官論曰。予讀范史所論寺人而歎其事之無極也。夫豎刁亂齊。伊戾禍宋。趙高覆秦。弘恭石顯之亂漢。政傾轍相尋。罔非殷鑒。乃至東京之亂。如蔚宗所稱。舉動回山海。呼吸變霜露。阿旨則光寵三族。忤意則參犖五宗。斯亦極矣。唐自楊高煽亂。輔臣繼之。幽園太上。喋血椒宮。爵真主。號尙父。重不可反。而後復有程魚仇田之僭擅。季明復恭之諄逆。九重惕息。甘同報獻。擊之不勝。則賢者爲陳寶。不肖者爲訓注。計窮憤極。而何進崔胤皆假手外兵。董卓朱晃之患成矣。明興太祖謂侍臣曰。吾見史傳所書。漢唐末世。皆爲宦官蠹敗。未嘗不爲惋歎。開國承家。小人毋用。其在宮禁。可使之供灑掃。給使令而已。豈宜典兵與政。故立制不兼文武銜。不干外廷政。不御外臣冠服。蓋三十年之間。宮府謐如也。至太宗而稍有所私寄。儼保之譖行而撫監岌岌矣。監車之勢張而馬駢以交趾予敵矣。再傳而天子幼沖。母后不中制。豎振遂滔天矣。舉全盛之四海。挾至尊之萬乘。以畀彘廬。恨其身死行陳。不獲櫛磔以謝天下。而復辟之後。反降制爲之灑洗何也。吉祥之創逆。汪直之啓釁。縲洩盈朝。屍骨盈邊。則此制媒之哉。武宗尸位。慢遊是好。八虎橫

三老絀奄瑾孽牙其間。叛藩乘之。幾覆廟祐。幸發自其偶。以收全勝。然一瑾死。百瑾生。參伍狡弁。表裏作姦。世宗赫然誅其渠首。收革諸鎮監軍。朝野吐氣。邊腹危而復安。則肅之爲肅宜也。神宗幼倚權相。未復倦勤。外廷朋黨與內監相應。和動有輕重。然威福中制。不假一政。故馮保等不爲瑾直之續。至熹宗童昏。漫不慮事。而魏豎之禍作矣。內倚乳保以滋其姦。外挾虎彪以肆其毒。清流滿北司。告密徧都邑。緹騎四出。忠臣諫士。交臂延頸而受其戮。府藏內盜。禁兵中擅。假子穢祠。爭寵競麗。幸天厭其惡。英王勃興。縛之如孤雛腐鼠。然而崇禎之世。不監前車。恨督撫之用兵無功。邊腹復置監視。因而狡弁驕卒。倚其芘覆。萎縮於行陣之間。武暴乎閭里之內。動輒鼓譟。掉臂而去。而此輩以婦人之仁。泣涕招安。文臣不得抒其籌策。故將士莫肯用命。究至開關延賊。皆寺人之徒。則逆豎之貽禍烈也。大抵明之璫禍。甚於西京。過於宋。而稍愈於漢唐之季者。以祖宗之防制具在。青宮豫建。無迎立廢置之權。朝發暮縛。無將相交兵之亂耳。至於竊爵掌兵。開邊隙市。內權毒流縉紳。固與國相終始也。其灼然稱賢如懷恩覃昌雲奇之忠勤。王承恩之殉節。百不能一。哀而次之。以存勸戒云。

雲奇。南粵人。太祖時守西華門。邇胡惟庸第。刺知其逆謀。惟庸誑言所居井湧醴泉。請上往觀。鑾輿西出。雲慮必與禍。急走衝蹕。勒馬銜言狀。氣方勃。蜂舌駭不能達。太祖怒其犯。左右搗捶亂下。雲垂斃。右臂將折。猶奮指惟庸第。上見狀。乃悟。登城眺顧。見其壯士披甲伏屏帷間。數市亟返。攬殿發兵擒惟庸。召奇。則息絕矣。上追悼之。錫贈加等。令有司春秋祀之。葬鍾山之西。樹碣表其忠焉。

阮安交趾人。清苦介潔。善謀畫。太宗營建北京宮殿城池及治塞村驛諸河工。皆大著勞績。諸屬一受成算。臨終。布衾衣篋而已。

鄭和洪武中入宮。豐軀偉貌。博辯機敏。太宗卽位。爲司禮太監。大見寵異。兩奉敕駕海舶入西洋。封諸夷國。通西南海道朝貢。著有勞績。人稱爲三寶太監。數使滇黔百粵。領上密諭。蹤跡建文。凡至其國。皆圖其山川城郭。條其風俗物產。歸成帙以進。以是諸國古未通中華者。多附貢云。

陳蕪。交趾人。永樂初入宮。至景泰時。歷事五朝。凡保抱皇子。四夷征討。悉與行。皆忠誠無疵繆。賜更姓名曰王瑾。寵賚甚厚。太宗時。賜範金圖書四。曰忠肝義膽。曰金貂貴客。曰忠誠自勵。曰心跡雙清。

沐敬時爲太監。太宗北征四十日。不見敵。兵困糧竭。而前進。山川荒僻。隨征大臣皆勸回鑾。上怒。爲鎖項從。敬復苦諫。上罵曰。反蠻。敬舉首曰。不知。不知。上怒。敬縛斬之。敬猶大聲諫不已。上忽悟曰。使我家養人。悉如此。何患不好。釋之。乃回鑾。

劉永誠。順天人。虎視屹屹。便騎射。三扈太宗北征。奉宣宗使。偵漢邸逆謀。三帥師討兀良哈。俘馘無算。捕執磁相妖人李宜張普祥。英宗朝。監鎮甘肅。耀兵境外。屢求辭職。杜門絕客。泊如素門。成化初。老。具辭累朝所賜產第祿物。從之。自居一奄若老僧。卒無長物。先是。憲宗欲封以伯爵。大學士彭時力爭之。或曰。中官古有封侯王者。時曰。此豈盛德事耶。祖宗成憲俱在。誰敢違之。事遂寢。而永誠亦無憾焉。

王振山西蔚州人。宣德中侍英宗於東宮。機慧狠譎。得英宗歡。及卽位。遂命掌司禮監。大見寵信。是年詔振偕文武大臣閱武於將臺。振遂集京營及諸衛武職試騎射而殿最之。奏指揮僉事紀廣第一。超遷都指揮僉事。上每爲先生而不名。所言惟聽。時輔臣方欲開經筵。而振專意導上布武。權焰日盛。惟畏太皇太后不敢發。一日振謂三楊曰。朝廷事賴三先生。高齡亦倦瘁矣。後當如何。又一日振以事詣闕。遂可否其間。榮等憤懣不平。不出視事。太皇太后遣使問之。乃告以故。太皇太后怒鞭振。押至闕中伏罪。且戒之曰。再爾殺無赦。正統二年春。太皇太后欲殺振。事在宮闈紀。四年十月。福建僉事廖模杖死驛丞楊溥。欲坐償命。楊士奇欲擬因公致死。互爭不決。請裁於太皇太后。王振因而進言。謂溥與驛丞同鄉。士奇與僉事同鄉。未免皆有私意。償命過重。因公過輕。宜對品降僉事爲府同知。太后聽之。自是振漸撫內閣之過。而權歸掌握矣。八年四月。太皇太后崩。楊榮卒。楊士奇以子稷之故。堅臥不出。惟楊溥當事。亦年老勢孤。後進皆委靡不前。於是內閣之柄悉爲王振所攘。生殺予奪盡在其手。盡去大臣不附己者。而兵部尙書徐禕工部侍郎王佑皆儉邪小人。首開趨媚之路。百計殷勤。極盡諂媚。自是舉朝皆爲父稱。振薦等又宣言於衆曰。吾輩不進見致禮者。必且得禍。衆聞之益懼。皆具金寶進贊。自此遂以爲常。初惟府部院寺大臣以後百執事及在外方面皆行之。當朝覲日。郡邑庶職亦無不然。一時以廉者爲拙。貪者爲能。被其容接者若登龍門。上下交征利。如水去隄防。勢不可止矣。王佑貌美無鬚。父事振。振甚眷之。一日問佑曰。王侍郎爾何無鬚。佑對曰。老爺無鬚。兒子豈敢有鬚。時聞之。閭巷傳笑。初振問於楊士奇。吾鄉人誰可大用者。士

奇薦薛瑄。時瑄爲山東提學僉事。乃召爲大理少卿。瑄至京。士奇白瑄宜詣振謝。瑄曰。安有受爵公朝。謝恩私門邪。後遇諸塗。瑄復不禮。振不悅。會有武官病死。其妾有色。振姪王山欲娶之。妻持不可。妾因誣告其嫡妻毒殺其夫。都察院問。已誣服。大理辨其冤。屢駁還之。都御史王文詒事振。譖之。振嗾御史劾瑄受賄。故出人罪。請廷鞫。竟坐瑄死罪。下獄。瑄怡然曰。辯冤獲咎。死何愧焉。在獄。讀易以自娛。至復奏。將決。家人乞代死。大臣有申救之者。會振老僕哭廚下哀。振怪問之。曰。聞薛夫子今日將刑。故也。振亦惻然。得免死。除名。放歸田里。南京國子監祭酒陳敬宗考績至京。王振素慕敬宗名。欲致之門下。適南畿巡撫周忱時亦在京謁振。振知忱與敬宗同年。語之以意。忱詣敬宗達之。敬宗不可。曰。吾爲人師表。而可求謁中官。忱乃謂振曰。陳祭酒書法極高。以求書爲名。先之以禮幣。彼將謁謝矣。振然之。乃遣文綺羊酒。求書程子四箴。敬宗爲書之。而返其禮幣。竟不往見。於是士夫之賢者。稱其風節云。六月。翰林侍講劉球。以災異上疏。中謂太常不可用。道士宜以進士處之。至是。編修董璘自陳。願爲太常少卿。振因誣球與璘同謀。故先以言爲璘地。逮球璘下詔獄。卽令其黨錦衣衛指揮馬順以計殺球。一日五更。順攜一小校推獄門入。球與董璘同臥。小校前持球。球知有變。大呼曰。太祖太宗之靈在天。汝何得擅殺我。小校持刀斷球頸。流血被體。屹立不動。順舉足踢倒。曰。如此無禮。遂支解之。裹以蒲包。埋衛後空地。董璘從旁匿。球血裙數日。密歸球家。家人始知球死。乃以血裙爲櫬歸葬。小校本盧氏人。與耿九疇爲鄉鄰。九疇素愛其年少俊美。因與往來。後久不至。甚訝之。一日來見。九疇視其貌。黃瘠不類。惜之。曰。汝無有疾乎。狀貌乃頓異如此。小校

吐實。且曰：馬順將舉事之日，密語吾曰：今夜有事，汝當早來。至期，令懷刃相隨，迫於勢，不敢不行。比聞劉公忠臣、吾儕小人，無故作逆。天理事，吾殆死有餘罪矣。特來別公，且謝娛愛。因慟哭，悔恨不已。未幾，果死。馬順子亦登狂疾，代球數順罪，一狂謂爲球所憑云。秋七月，振惡祭酒李時勉守正，誣搆傾擠，傳旨荷枷國學門。諸生石大用上章願以身代，號哭奔走闕下者數千人，釋之。勒致仕去。諸生涕泣送者塞途。京師爲之罷市。霸州知州張需才，長於治民，先佐鄭州，有聲。泊守霸，見民游食者多，每里置簿列戶，各報男女大小口數，派其各種粟麥桑棗，紡績之具，雞豚之數，徧鄉示之。暇則下鄉至其戶簿驗之，缺者罰之。於是民皆相勸，勤力無游惰者。不一年，俱有恆產。生理日滋，蓋以生道使人，其易如此。朝覲至京，遂受旌典。尋畿內蝗作，捕之有法。吏部侍郎魏驥巡至其郡，異之下其法於諸郡。有牧馬者擾其民，需笞之。領牧者譖於振，捕之下獄。董楚幾死，竟謫戍邊。十三年，福建參政宋彰交趾人，結納中官，肆侵漁，餽振，得陞左布政。抵任，計營所費，驗戶科斂，貧乏者爲所迫，至不聊生。於是鄧茂七因人心搖動，遂畜異志，乘縣句攝，嘯聚窮民，一呼而集，旦夕數萬。東南震動，浙寇聞風而作。若火燎原矣。十四年冬，北酋長也先遣使二千餘人進貢馬，報作三千餘人，振怒其詐，減去馬價，曾使回報，遂失和好。衆數萬入寇大同，兵失利，邊塞城堡多陷沒。警報時至，振不與大臣議，勸上親征。百官伏闕上章懇留，不從。七月十七日，駕發京師。八月，至土木，敗績。車駕北狩。皇太后命籍振家，其珍奇寶玉綺繡及金銀，凡十餘庫。磔振姪錦衣衛指揮王山於市。族屬無少長皆斬。英宗復辟，追復振官，立祠祀之。先是，正統中，振作大第於皇城東。又明年，作智化寺於第。

左及土木之變。言官劾其擅權誤國。或有謂今陷寇中。反爲寇用者。振族黨並誅。第宅沒官。改京衛武學。至是振黨以聞。上大怒曰。振爲寇所殺。朕親見之。追責言者。皆貶竄。詔復振原官。刻木爲振形。招魂以葬。塑像於智化寺北祀之。敕賜祠額曰旌忠。憲宗立。以言論毀之。

阮浪。河間人。侍英宗南宮。浪下內官王堯者。往蘆溝橋抽分。浪以南宮所賞鍍金梁扣綉茄袋鍍金結束刀一把與堯。堯歸。飲錦衣指揮盧忠家。蹴毬褫衣。忠因見其刀袋非常制。遂令妻進酒醉堯。解之。俄而入皇城。白裏行太監高平。以爲南宮欲謀復皇儲。令浪遺堯以刀袋賞忠。求外應。堯竟以此與浪。義子趙縉皆凌遲沒產。浪入詔獄。炮烙煅煉。苦慘備至。卒不承命。斃獄中。英宗復辟。平忠亦凌遲。贈浪御用監太監。命儒臣撰文立碑。官緡子銳錦衣鎮撫。

曹吉祥。不通文墨。恐事歸司禮監。稍附內閣徐有貞。李賢行己意。吉祥侍禁中最久。正統景泰間。征麓川。福建諸寇。皆充監軍。號都統。因帶去韃官軍能騎射取功。遂收置麾下。結爲牙爪腹心。後迎駕。亦用此輩爲助。俱冒大職。兄鐸從兄鑾皆都督。弟鉉爲都指揮使。韃官伯顏也先等亦爲都督。從子欽冒功。封昭武伯。與石亨爲左右臂。時稱曹石云。後亨敗。冒功者皆奪爵。此輩以吉祥庇得不動。吉祥竊歎曰。亨與我同。亨死。我安得不反。結事張鵬。御史楊瑄等嘗論奏吉祥。吉祥泣訴於上前。得免。以故志益驕。未幾。黨陳汝言敗。上漸覺吉祥。且厭其干國事。欲抑之。念迎復功。多所優假。久之。上廉迎立外藩之誣。因銜吉祥。李賢一日。因極陳奪門不可爲功。上始大悟。重疏抑之。吉祥不自安。卽懷異志。會御史論曹欽不法事。詔書飭

欽遂行謀吉祥欲幽上於南宮而立皇太子及是陝西有鹵報上命兵部尙書馬昂懷事伯孫鏜帥師往禦期是月初二日早昂等陛辭行吉祥與欽謀以是日欲乘機殺昂等擁兵入大內作亂事頗泄是日晚都指揮完顏者禿亮聞之急詣長安門告變時漏下二鼓奏入詔侍直中官執吉祥於內庭欽等不及知四鼓欽與鉉及鐸鐸伯顏也先等統番漢兵五百騎直抵東長安欽見門閉度事露急引兵詣錦衣衛指揮逮昶第執昶殺之時百官候朝待漏聞甲馬馳驟之聲謂征陝師出也既乃大亂百官多亡匿鐸率數騎而西殺都御史寇深欲殺尙書馬昂不得得大學士李賢於公署及尙書王翱於東朝房又散傷廣寧侯劉安欽遂縱火焚東西皇城門會大雨火滅欽欲殺李賢王翱不果賢被刀傷欽叱刀者脫之且告賢曰吾父子兄弟盡忠迎駕今被逮昶返欲相害因擲頭示賢曰誠爲此人激變非得已也賢曰此人信生事怨之者多旣除之可卽請命欽請賢爲作草疏進賢就翱所索紙爲草疏仍同翱自門隙入之昧爽孫鏜領兵至圍之翱得脫走比旦王師漸集詔會昌侯孫繼宗領兵討賊孫鏜督諸軍先登恭順侯吳瑾及諸將分道迎擊馬昂以精兵殿之大戰於東華門外瑾爲欽所殺諸將奮擊斬鉉及鐸於陣又斬鐸於欽第欽匿其家智井中引出斬之伯顏也先縫城遁追獲斬之賢聞首惡旣盡誅恐衆心危疑卽具疏請宣令諭脅從者罔治以安反側捷奏是日晚上御午門朝百官詔吉祥磔於市籍沒其家餘黨並放嶺南遂詔天下布寬恤之恩一切不急之務悉皆停罷與民休息贈瑾梁國公諡忠壯深少保諡莊愍繼宗進太保鏜進懷寧侯昂翱賢加太子少保進完顏者禿亮爲都督餘將士陞賞有差

金英在正統中與興安同時爲太監二人俱志端識卓咸謂其有大臣風度當正統己巳之變人情洶洶思南遷以避之二人奉上命召廷臣集丹墀下獻計且對衆誓曰寇旗決不可使過都惟嚴厲城守爲最上計時惟于謙主守議二人協之選將練兵爲戰守長策區畫有方時侍講徐埏負時名以其占術倡言京師不可守必須南遷英首叱之令人扶出又宣言於廷曰死則君臣同一處死耳有以遷都爲言者上命必誅之成山侯王通欲挑京師外城興安鄙之不行賴二人奉景帝主謀於中固守之議始決景泰甲戌英奉命南京時公卿俱餞英江潯薛瑄獨不往英心重其人及還京每揚言於衆曰南京好官惟辭卿耳時景帝有易儲之心一日語英曰七月初二日東宮誕辰蓋謂懷愍以餽英也英叩頭對曰東宮生日是十一月初二日蓋所對者憲宗也景帝默然時景帝最信任于謙言官有言其柄用過重興安曰只說日月與國家分憂不要錢不愛官爵不問家計朝廷正要用人似此才諸公尋一箇來換於是衆議乃息英宗復辟斥遠之憲宗在宮中知二人忠謀仍擢近侍以壽終

懷恩直隸河間人禮科給事中戴綸之幼子也綸字希文侍宣宗於皇太孫時以諫獵繫獄死恩幼被宮賜名懷恩成化間任司禮太監恩初受學翰林學士錢溥恩謂人性頗正直又長於問學及任司禮監上愛之一日遇聖誕被賜金二錠奏云臣蒙恩至此皆師父錢某之惠願留此金以轉奉會溥考績至京恩置宴以前金爲壽成化甲辰僧繼曉以服獻大建淫祀時主事林俊諫忤旨人皆危俊不測恩叩頭諍曰不可自古未聞有殺諫官者我祖宗朝開大言路故底盛治今欲殺諫官將失百官與天下之心奈何臣

不敢奉詔。上震怒曰：「汝與林俊合謀，姍我，不然，彼安知我宮中事？」因舉御前硯，擲之。恩以首承，硯不中，復怒仆其几。恩免冠號哭不起，曰：「不能復事陛下。」上命左右扶出，至東華門，恩使謂鎮撫司曰：「若等諂梁芳，合謀傾俊，俊死，若等不得獨生，遂徑歸臥於家。」曰：「中風矣，不復起視事。」上命醫調治，使者旁午於道，已而上亦釋俊。時有星變，黜傳奉官，御馬監太監王敏乞於上，凡馬房傳奉不必動，上允之。敏持疏謁恩，跪於庭。恩徐曰：「起。」病實不能爲禮，問何爲。敏曰：「已得旨。」凡馬房傳奉不復動。恩大言曰：「星之示變，專爲我輩。」內臣壞朝廷法也，外官何能爲？今甫欲正法，汝等又來壞之。他日天雷將擊汝首，指其坐罵曰：「吾不能居此，汝來居之。」汝兄弟一家，徧居權要，今乃爲此耶？敏惶怖歸家中，氣死。又有章瑾以獻寶石，進鎮撫司。上命恩傳旨，恩曰：「鎮撫掌天下之獄，極武臣之美選，奈何以瑾得之，不肯傳。」上曰：「汝違朕。」恩叩首曰：「非敢違命，恐違法也，不得已。」乃命覃昌傳之。恩曰：「倘外庭有諫者，吾言尙可行也。」時尙書余子俊在兵部，恩諷之曰：「第執奏，吾爲汝從中贊之。」子俊謝不敢。恩歎曰：「吾固知外廷之無人也。」時惟王恕每疏諫，時事切直，恩力扶之，每疏至，輒歎曰：「天下忠義，斯人而已。」時太監梁芳有寵於上，或告以固寵之術，時上鍾愛與王爲芳計，曰：「不如勸昭德勸上易之。」立與王是昭德無子而有子，與王無國而有國，如此，可保富貴於無窮，豈直免禍哉？芳以爲然。乘間言於昭德宮，勸易儲。時懷恩聞之，歎曰：「此事只在懷恩。」上召問懷恩，微露其意，恩免冠叩頭曰：「奴婢死不敢從。」寧陛下殺恩，無使天下之人殺恩也。伏地哭不起，上不懌而罷。恩退，遂閉門不出。已而詔往鳳陽守陵，以覃昌代之。丁未，孝宗卽位，召還。時何喬新有人望，大學士萬安欲遠之，黜

爲南京刑部尙書。恩一日詣內閣。言新君卽位。如何令喬新去南京耶。安默然。上斥安。安乞哀。猶無去意。恩遂摘其所懸牙牌曰。請出矣。恩雅重王恕。剛正。力薦於上。遂召爲吏部尙書。其黨正擯邪類如此。大學士劉吉黨安。嫉恕。恩深知恕賢。力護之。得不害。時言路大通。造言者過激。或指內臣爲刀鋸之餘。覃昌大恚。恩曰。彼言是也。吾等本刑餘之人。又何怒焉。其黨遂不能起。人雅慕其義云。

阿丑者。憲宗時優闍也。多機警。善恢諧。每於上前作院本。多有謔諷之風。時汪直驕橫。一日。丑於上前作醉人酗酒。一人伴曰。某官至。醜罵如故。又曰。駕至。醜亦如故。又曰。汪太監來矣。醉者驚迫。帖然。傍一人曰。駕至不懼。而懼汪太監。何也。曰。吾知有汪太監。不知有天子。由是直寵稍衰。時王越陳鉞媚直。結爲死黨。丑復作直持雙斧趨踰而行。或問故。答曰。吾將兵。惟仗此兩鉞耳。問鉞何名。曰。王越陳鉞。上哂之。而朱永掌團營。役兵治私第。丑作儒生高吟曰。六千兵散楚歌聲。一人曰。八千爭之不已。丑徐曰。汝不知彼二千爲保國家作屋。上密遣人察之。永懼。卽撤工。時上下行政多頗。丑於上前作六部差遣狀。命精擇之。旣得一人。問其姓名。曰。姓公名論。主者曰。公論。如今無用。次一人曰。姓公名道。主者曰。公道。如今亦難行。最後一人曰。姓胡名塗。主者首肯曰。胡塗。如今儘去得。上亦微哂之。不罪也。丑每事規諷多類此。

汪直。廣西獠種。幼彼俘。入昭德宮。黠桀。最有寵。陞御馬監太監。憲宗懲李子龍事。設西廠置獄。命直往外調察。初出布衣小帽。時乘驢或騾。往來京城。內外人皆不之疑。有韋瑛者。市井無賴。投內官章姓者爲僕。從征延綏。冒功陞百戶。直收之領校尉。用事。自置獄。凡街市鬪毆罵詈爭雞縱犬及一切迴避不及者。卽

加箠。致煩上聽。衆益效之。多爲賈書。誘人密以情告行事者。捕下獄。加以法外之刑。冤死相屬。託以捕妖言。圖官賞。無敢言者。楊榮曾孫。羣以人命入都營。爲瑛所刺。謂羣家資鉅萬。曾納生人棺中。招集亡命下海。謀不軌。卽掩捕下獄。波及其姪郎中楊仕偉。壻主事董序。卽家拷及妻女。羣仕偉備嘗酷刑。羣死。因籍其家。沒人口資財。赴京。所過鴟張虎噬。有司賄賂狼籍。且謗及諸大臣。上由此信任之。威勢壯烈。吏部尙書尹旻。引爲內助。都御史王越。因從征。識瑛。藉之通情款。直益縱恣。御史王本。雲貴刷卷還。就其寓舍。搜得象笏等物。坐罪。刑部郎中武清。勘事廣西還。執訊無所得。釋之。不以聞。禮部郎中樂章。太醫院判蔣宗武。行人張廷綱。使安南還。浙江左布政劉福起服。皆執下獄。益遣校尉四出。內自京營。迨外鎮守總兵等處。採聽事情。跟緝鉗制。沿河分布盤詰。獨嚴於公差官員。倚勢搜檢。無復體貌。道塗皆阻。商賈不通。直又日挾數千人所在穿繞。震呼辟道。雖大臣莫不引匿。一日過兵部。尙書項忠蚤朝。不避。就左掖下呼名。朝罷。校尉擁逼而去。直伴不見。叱之始散。法司曹郎御史等官。每遇弔查文卷。俱親齎赴廠。竟日伺候。不得一見。東西長安門牌上用黃紙貼寫太監汪傳奉聖旨。不書名。見者無不驚駭。司禮太監黃賜陳祖生。每訴於上前。皆譖之。發南京。韋瑛益引進奸人。王英專託人陰私以固信任。人情洶洶。五月丙子。大學士商輅。學士萬安。劉珝。劉吉言。近日伺察太繁。法令太急。刑網太密。官校拘執職官。事皆出於風聞。暮夜搜檢家財。不見有無。鴛帖。人心震懼。各懷疑畏。內外文武重臣。託之爲股肱心膂者也。皆不安於位。百司庶府。官資之以建政立事者也。皆不得其職。商賈不安於市。行旅不安於途。士卒不安於伍。庶民不安於

業承平之世。豈容有此。蓋緣陛下委聽斷於汪直一人。而汪直者。轉寄耳目於羣小。如韋瑛者。自言親承密旨。得專予奪。百官進退。盡在掌握。擅作威福。虛張聲勢。其同惡相濟。如王英。則以附己而薦之。稍存公論。有所諫正。則以異己而黜之。一如狼虎。並無忌憚。傷害良善。大爲聖德之累。陛下若謂防微杜漸。不得不然。則前數年間。何以帖然無事。往者曹欽之反。皆由逮昶生事。有以激之。人所共知。可爲明鑒。方妖物傷人。當時人言。必有應驗。及立西廠。驚動人心。一如妖傷之狀。以此觀之。天道示儆。不可不慮。伏願皇上體天道之包容。勿察察於事情。遵祖宗之成憲。勿屑屑於改易。旨意必經於六科。防將來之假冒。奏訴必由於通政。杜濫受於他門。責政事於府部。而嚴課功覈實之權。付刑獄於法司。而申三覆五奏之令。收回伺察之人。誅逐姦邪之輩。其有謀逆姦細。并貪賊壞法重情。悉依舊規。委任歷練老成之人管理。如此。則讒言不入於耳。苛政不加於下。國家長治。聖壽無疆。皆在於此。不然。此風日長。國之安危。未可知矣。疏入。上震怒。命太監懷恩。覃昌。黃高。至閣下。厲色傳旨。謂輅等曰。朝廷用汪直。緝訪姦弊。有何壞法。爾等遽如此說。是誰先主意。輅等對曰。汪直違祖宗法。壞朝廷事。失天下人心。輅等同爲朝廷除害。無有先後。恩曰。不然。聖意疑此奏。未必四人皆同。然下筆必有先之者。安曰。某等同受朝廷厚恩。同一主意。誰獨爲先。珣奮然泣曰。某等奉侍皇上於青宮。迨今幾二十年。幸而朝廷清明。四方無事。今忽汪直爲害。使遠近不安。何忍坐視。某等誓不與彼共戴天。吉曰。汪直之罪。縱使某等不言。人必有言之者。今既奏入。貶謫黜罰。惟命不避。於是恩降色徐曰。朝廷命恩等問具奏之由。今皆執論如此。當實回話。儻上召問。幸勿變前言。輅

等曰。唯恩等去。輅舉手加額曰。衆先生肯爲朝廷任事如此。輅復何憂。蓋安等三人皆隨侍青宮。輅以先朝舊臣。恐上見疑。且慮三人或不同心。故云然也。已。恩等復至。傳旨曰。卿等所言良是。汪直壞事。朕實不知。今便革去西廠。散遣官校。卿等各安心辦事。輅等皆頓首謝。翌日。兵部尙書項忠具草會諸部院大臣共劾之。留中不報。遂罷西廠。召恩數直罪而責之。復還本監。調章瑛於邊衛差操。諸旗校在外者俱撤還。人心快之。然上之密信任如故。仍傳旨用其黨吳綬於鎮撫司理刑。直目不知書。綬粗曉文義。能撰奏章。有薦者。故用之。輅等言雖行。知其禍尙未已。而項忠初具草。令武選郎中姚璧特赴吏部尙書尹旻。請署名。旻曰。本兵部所選。當以兵部爲首。璧曰。公六卿之長。以次當爲首。旻怒曰。今日纔認得六卿之長。旻既署名。卽遣人報章瑛曰。本兵部所寫。某但以次居首爾。又數日。都御史王越遇珣與吉於蚤朝。越曰。汪直所行事儘公道。如黃賜專權納賂。非直誰能去之。且商萬二公在任。久事多。故有所畏。二先生入閣。幾日。況直加意扶掖。何爲亦論列乎。珣默然。吉曰。不然。某等言事爲朝廷。非爲身謀也。設使汪直行事皆公。朝廷置公卿大夫欲何爲。天下後世謂此爲何等時耶。越無以應。遂與吉疏。時廠中所執人甚多。皆無案籍。既革。其人各散去。蔣宗武囚服到家。家人猶不知覺。項忠尋革職爲民。六月。御史戴縉言。近來災變洊臻。皇上諭兩京人臣同加修省。夫何訓誥彰彰。聽之藐藐。未聞大臣進何賢才。退何不肖。以固邦本。亦未聞羣臣革何宿弊。進何謀猷。以匡治理。惟太監汪直。緝捕楊暉。吳榮等之姦惡。高崇王應魁等之賊貪。又如奏釋馮徽。冤抑之軍。囚禁裏河害人之宿弊。是皆允合公論。足以服人而警衆者。奈部下章瑛等不體聖心。

猖狂行事。已得大臣奏允。即將西廠革罷。又見皇上此心。卽古帝王從諫如流之盛心。伏惟皇上推誠任人。及時修改。務俾宿弊革於下。善政清於上。然後天意可回。并條數事。其一。令大臣自陳。并請敕內府各監及錦衣衛禁治。上悅其言。命所司詳議施行。縉九年滿。未陞。久無聊探。知西廠雖革。汪直猶幸。乃假災異建言。頌直功德。以覬倖進。先以奏草示吳綬。達於直。直得之。爲言於上。然後奏之。御史王億亦奏。以爲直所行。不獨可爲今日法。且可爲萬世法。傳聞四方。莫不唾罵。於是直復開西廠。調察益苛。人不堪命。縉奏內自陳一事。尤迎合直意。蓋直嘗謗楊暉投大學士商輅都御史李賓尙書董方等賄求緩其罪。上信之而難於施行。縉言適中機會。故尤爲直喜云。其月商輅致仕去。工部尙書張文質執下廠獄。上聞。切責錦衣衛。釋之。亦不問也。直威勢愈張。江西人楊福。詐稱直自蘇入浙。及閩。所至官司。望風跪謁。左右索賄無算。爲鎮守內臣覺而縛之。十一月。直請嚴文武乘輜之禁。又請查都城逋逃軍民。皆從之。直旣屢興大獄。猶不快意。或以邊功說之。大喜。乃謀之王越。越曰。外夷可乘也。而陳鉞撫遼東。殺入貢夷人起釁。十四年。直欲自往體察。閣臣萬安亦以爲不可。乃以馬文升往。比招安功垂成。直又請行。以處置邊務爲名。許之。至遼。不見敵。因殺無辜。掘死人髑髏以報。文升因之得罪。又與陳鉞比。陷副都御史牟俸。侍讀學士江朝宗等。皆得罪。初。直之行也。鉞先遣人賂朝貴與直相厚者。爲之地。又令人自廣寧抵山海關。諷居人候直過。羣伏道左。告保巡撫官行事公當。會及軍民。時直左右多有納鉞賂者。因加稱贊。直信之不疑。至廣寧。鉞便服雜僕從中。朝夕左右。惟直所命。直遂喜與之合。鉞前爲山東布政。牟俸時爲巡撫。有頃。俸改撫

直隸行事多不合人心。如禁索私租。勸富家出賑濟穀。動以千計。絕京官請託之類。由是怨謗喧然。直會往南京。聞之未發。至是。俸議事至京。直還朝。鉞因嗾直發之事。連翰林院侍讀學士江朝宗。并浙江僉事吳珣。鎮江府知府黎福。常州同知柳演。蘇州推官華清。吳江等縣知縣馮衡。孟瀛。宋端。驛丞甘仲璫。義官王祥民。吳伯昌等。時惟朝宗在京。併下獄。餘命錦衣衛差官逮治。凡半年。珣等始至。謂朝宗與俸有連。仲璫其壻也。爲華清通賂於俸。衡亦俸鄉人。斂民財以餽瀛。爲部民所訐。黎福按之。柳演代行賂。并吳珣按宋端。皆受賂。俸不能察。理刑千戶吳綬拷訊。皆不實。俸獨誣服。受常熟等縣糧長銀三千五百兩。例追入官。俸不能辦。連坐者共爲備納。部擬俸等各坐徒杖。贖還職。珣及福皆無罪。釋之。奏上。上以俸職司風紀。容通私賂。謫戍。朝宗調市舶提舉。十五年。直請加尹旻太子太保。從之。給事中王坦。山東人。以都給事中。趙良年老居先。嗾直奏良疏詞不謹。失體。且輕浮。難居言路。調廬山知縣。蓋尙書王直大學士劉珏實主之。遼東失事。直與定西侯蔣琬刑部尙書林璫往勘。諸將降罰有差。尋宜大遼東告警。直往行邊。還。陳鉞復希直意。奏言。蓋州女直。伏當加恨。不得都督聲言來寇。往年蓋州三衛。搆海西毛憐。累犯邊境。朝廷授以都督都指揮之職。諸夷因起爭端。紛紛擾亂。亦欲挾制以求顯職。與其加陞而招侮。莫若整兵而征討。請簡剛正謀勇大臣。掩其不備。擣其巢穴。庶不縱寇長姦。尙書余子俊等集議。朱永珣印總兵。直監督討之。直遂弄兵。諸大臣畏其勢。司禮內閣又有結爲心腹者。鉞奏得行。仍命鉞參贊軍務。方鉞奏上。子俊以鉞開邊惡之。永直將兵。殊不及鉞。鉞疑爲子俊所沮。乃言本朝未嘗有武職節制文大臣者。且征討重務。